

十
朝
詩
乘
(一)

臺灣學
生書局
印行

十
朝
詩
乘
(二)

臺灣學生書局印行

十
朝
詩
乘
(三)

臺灣學
生書局
印行

十
朝
詩
乘
(四)

臺灣學生書局印行

142/106/116

中國史學叢書
續編

十朝詩乘

民國二十四年刊本
景印本精裝四冊

撰者：清·郭則澐

出版者：臺灣學生書局

本書局登記證字號：行政院新聞局局版臺業字第一一〇〇號

發行人：馮愛羣

發行所：臺灣學生書局

臺北市羅斯福路三段二九八號

郵政劃撥帳號二四六六號

電話：三二四一・三三一三・三三六七

定價新臺幣

\$2660

中華民國六十五年二月號，初版

2100

版權所有・翻印必究

十朝詩乘序

古者輶軒采風誦詩知政詩亡迹熄春秋迺作詩與史之關繫大矣蓋政教之興替風俗之醇漓史冊所未能備者徵之歌謠而可見而人事蕃變是非得失亦往往於學士大夫諷詠所及有以得其委折始末之真此論世知人尤所賴以攷證者也自來從事於斯者畧分二途一則以史證詩就作者出處時事以求寄託之所在然後與觀羣怨之旨明以詩爲主箋注家之事也一則以詩證史藉當時見聞輿論以闡紀載之所隱然後褒貶美刺之義顯以史爲三掌故家之事也二者之中以

證史之所關爲尤重有清三百年國史備矣而載筆纂
嚴官中檔籍之外不得泛涉又屢興文字之獄私家著
述忌諱孔多不及前代野史之夥惟是詩人諷諭言隱
志微雖非盡據事直書或感時述志或引古譬今其足
以補佚聞而資定論視他紀載轉多可據然覽者苟非
習諳掌故胸有鑑衡不能於傳聞異辭折衷求是亦如
作史者備才學識之長而後可與言斯事也嘯麓提學
喬木世家早膺史職繼復敷歷中外文章政事彪炳一
時洵所謂擅九能而兼三長者比年退居沽上殫心纂
述於是成十朝詩乘廿有四卷其託體雖仍詩話實爲

補史而作近代詩話以靜志居蒲褐山房二者並號翔
實第因選詩而備載作者遺事事僅係於一人最近楊
子勤前輩撰雪橋詩話所載多關掌故尤推博瞻然其
本旨猶在傳人以事爲緯取材特善今是書專重紀事
取義似更有別而博瞻則同同時媲美足掩前人非過
譽也緬惟先德文安公曩以先朝耆獻膺脩史之聘惜
未竟其志又佐東海公輯清詩曾撰論詩絕句百首綜
括一代論斷精嚴有裨風教孫桐於是二役皆忝陪末
席熟聆緒論得奉指歸私以爲幸今復睹提學是書之
成淵源家學推衍庭聞古所稱魯國韋氏之傳詩扶風

班氏之傳史於是兼之他日倘議重脩清史必賴是書
補闕訂譌得折衷之助與尋常詩話之只譚風月固不
可同日語爾敢據斯義用質來者乙亥六月江陰夏孫
桐序

序

蟄雲女夫纂十朝詩乘凡二十四卷曰十朝者斷自定
基逮於守府博蒐叢什參鏡軼聞酌羣言於大雅如綴
鄭箋勒一代之鴻篇卽爲蔣厓削橐旣竟屬序於余余
維輶軒有采寔太史之司康衢著謠亦大夫所誦是故
四始通於國政五際驗乎天鈞其盛也則車攻蹈厲夫
周京其衰也則茗華歆歔夫王述詩爲史輔伊古然矣
班馬以降紀載迭詳然漢史證楚戍荒嬉則錄韋賢之
諷宋書述湘州怨望則徵五君之吟他若杜陵諸將之
詠規及軍麾道州春陵之行恫於民瘼胥關史料竝垂

辭林惟是霈珠散見於諸家碎金靡鎔於一治求其萃
叢殘窮端委變唐賢詩話之格代宋世史鑑之編則是
書其創例也蟄雲起山王之右宗冠嚴徐之清選公卿
訝賈生年少先帝識蘇軾奇才雲霄垂上阻健翮於迴
風陵谷多悲託柔毫而送日網羅見聞於千百家之作
編次事實於廿餘年之中述聞有自奉顧悌之先徽攷
事必精黜王沈之曲筆綜其美備可得而詳在昔釋奠
紀晉賴潘頌以耀文納諫稱唐著杜詩之折檻奏凱河
東之日范果陳章求賢渭水之風佺期播詠鴻藻旣暢
懿矩斯尊推至踰沙請吏顏延年之英辭輦羽輪珍杜

正元之盛構凡此雅管風琴之奏類爲義繩陶象所宣
茲編旨寓歸仁義宗宣德闡績於冰天桂海讀者猶覩
休明披祥於紫脫朱英序之卽爲謨典是日存媿其善
一也又若相公忠孝或諷洛陽之花司空退潛或詆終
南之徑自非操觚之助幾沿執簡之疏况乎蘭臺記注
忌諱良多竹素流傳是非滋紊叔夜不聞臣馬而誤入
晉書幼安何曾仕曹而卒登魏志龔詆類此更僕難終
茲編以述者自名必言之有本平亭丹素自成季野陽
秋剖扶條流不廢卞彬指刺是日糾舛其善二也又若
猜忌興於同列則海燕成吟讒構以壞長城則符鳩騰

唱公是詎無隱蔽微辭要有折衷自來沙泥易混冰炭
何常拾遺篤友浪傳嚴武操戈義山見疏乃賦山公把
酒徒懸疑論孰抉秘緘茲編析文魚網握契驪珠於辭
無假譬明鏡之照形其事可徵匪契舟而求迹是曰表
微其善三也花卿不傳瘡癰則壯略將湮魯達倘失題
棺則丹心亦泯元遺山之表節一集端藉中州寇萊公
之懷清片什以聞北使世方尊夫目論史亦等於官書
故羽陵之墜簡有待補苴銅川之小言每資采撫茲編
簡金有得積玉以成韓悲白樂殫求於泊宅之篇衢泣
魴歌悉著爲潛夫之論是曰蒐軼其善四也惟茲四善

寔具三長蓋揚蔡鋪藻者聲府之鉅觀而比事屬辭者
史家之遺直蛰雲於此致力勤而用心苦矣猶憶漢渚
騰鋒淞江掃軌數晦瀟者經歲共冰玉者一樓桑海留
命心繫衰親桂山懷歸目窮故壠念沸鱗之焉託抱蠶
簡以爲緣左塹右鉛之側藜榻任穿霜鈔星纂之餘管
城屢禿然而崦暉尙駐忍擬永初流人信窮終懷典午
縱謀掇拾甯免值個迨夫河陽寄居荒駝已傷於舊陌
平津出狩寒烏且戀於行朝瞻佳氣而猶疑冀橫流之
不極乃至挽河力盡算海劫窮痛龍穴之旣徙泗鼎猶
淪悲麟經之云亡秦灰曠檢於是命辭子墨役志汗青

傳音鳴節裘並集夫千狐準古申今衡亦齊於六燕金
鑑斯炳勝謝希深都廳之談鐵函有傳寓鄭所南本穴
之痛爲史氏者宜置之座右言詩學者殆莫與比肩假
以名山事業政坐虞卿窮愁存茲清廟典型庶見魏徵
簡正僕也早直東觀慙無紬史之功舊夢西泠長憶談
詩之樂接珠璣於元節我愧劉摯闡虹日於明昌今推
韓玉敢云授硯如披丹篆之奇決爲傳書待補墨莊之
錄乙亥夏五樂靜老人俞陞雲

十朝詩乘卷之一

龍顧山人纂

古者詩掌於太史詩亦史也且若武丁之伐荆楚周宣
之平玁狁創亂定傾爲國大政乃尙書失紀遷史亦闕
微雅頌宣闡則鴻烈幾於不彰漢魏以降代有專史然
油素競掇汗青滋淆參證墜聞猶資篇什梁史謂司空
圖躁進稍抑其銳憤憤引歸讀其題亭之作旨歸忍辱
又奔問歸山詩云多病形容五十三誰憐借笏趁朝參
清直畏慎其人自見夫豈居山釣名者通鑑唐昭宗紀
謂貞元之末宦者典兵崔允極論其失而昌黎永貞行

云北軍百萬虎與貔天子自將非他師直如韓公奚至
爲中奄曲筆則其事亦不能無疑又唐書嚴武傳謂武
厚杜甫亦屢欲殺之證諸甫與武詩殊不盡然王珪傳
謂珪微時與房杜善母李預識二君公輔按之杜子美
送王砮詩語亦復互異他若鮑明遠劉後村輩文苑不
載並賴遺篇以傳其例殆難殫舉不佞舊史官也一朝
信史志焉未逮光宣所見也咸同所聞也上溯以至順
康則所傳聞也所見所聞已異辭况所傳聞者乎蘭臺
紀載宜若可徵乃觀孫琴西太僕初入史館詩有云大
師祭酒稱老儒奮筆似學東家書豈無缺陋襲訛謬氣